

UTUSAN MALAYSIA

DATE: 10/4/2011

Proses transformasi pembangunan menyeluruh, menepati kehendak rakyat Luar bandar diutamakan - Najib

Oleh **MOHD. FAIRUZ YUSOF** dan
M. SHAHRINNAHAR ABD. LATIF
utusanpahang@utusan.com.my

PEKAN 9 April - Proses transformasi pembangunan di negara ini tidak hanya tertumpu di kawasan Lembah Klang atau bandar tetapi turut meliputi masyarakat luar bandar serta pedalaman.

Perdana Menteri, Datuk Seri Najib Tun Razak berkata, proses transformasi dilaksanakan secara menyeluruh dan menepati kehendak rakyat.

"Dalam erti kata lain, tidak ada rakyat yang tidak mendapat manfaat daripada hasil transformasi itu kerana pembangunan dilakukan secara menyeluruh dan membawa kesejahteraan kepada negara," katanya ketika berucap pada majlis penyerahan kunci rumah kepada 130 keluarga di Agropolitan Pekan, Batu 8, Mukim Lepar dekat sini hari ini.

Hadir sama, Menteri Besar Pahang, Datuk Seri Adnan Yaakob dan Ketua Pegawai Majlis Pembangunan Wilayah Ekonomi Pantai Timur (ECERDC), Datuk Jebasingam Issace

John.

Pada majlis itu, Najib turut menyerahkan bayaran insentif khas kepada 30 peserta Orang Asli berikutan kejayaan jualan biri-biri Dorper secara bidaan yang diadakan oleh Majlis Pembangunan Wilayah Ekonomi Pantai Timur (ECERDC) pada tahun lalu.

Jualan tersebut berhasil meraih RM265,550 daripada 465 ekor biri-biri yang dijual kepada para pembida yang berjaya.

Menurut Perdana Menteri, pembangunan luar bandar telah dilak-

sanakan sejak pelancaran Buku Merah yang diilhamkan oleh Perdana Menteri kedua, Allahyarham Tun Abdul Razak Hussein.

Kata Najib, tumpuan terhadap program itu tidak terhenti begitu sahaja malah diteruskan sehingga kini dengan memberi tumpuan terhadap pembangunan sosioekonomi masyarakat luar bandar.

Tambahnya, segala usaha yang dilaksanakan berjaya mengubah kehidupan masyarakat luar bandar ke arah lebih baik dan memberi sejahteraan kepada kehidupan me-

reka.

Dalam pada itu, ketika berucap pada majlis ramah mesra dan pelancaran Kawan Motorsports di kediamannya di Peramu di sini hari ini, Perdana Menteri mahu setiap program yang dirancang untuk golongan muda dan belia perlu dilaksanakan berdasarkan citarasa serta kegemaran mereka.

Kata beliau, pihaknya tidak mahu sesuatu program belia ditentukan oleh golongan dewasa sebaliknya ia perlu dilaksanakan berdasarkan keinginan kaum muda.